

Iu e tu

Chi mari
chi celu 'sta sira
trapuntu
di stiddi lucenti!
L'amuri mì vugghi
nò pettu...
li to' vrazza
mi strincinu forti.
Tessinu 'i manu
carizzi... carizzi...
'u teniru 'ncantu
mi strinci.
Lu mari sirenu
d'amuri suspira
mentri a luna
sbrizzia lu so' argentu
a stu mumentu
chi chinu di malìa
ju sentu...

Canzuni d'amuri

T'innisti amuri
e la me' vita s'oscurau
e un pezzu di cori
mi mancau.

L'amuri
chi m'abbrucia dintra
m'abbatti, mi distruri
mi scunsula.

E mi sentu
nà vela arsa di ventu
e mi sentu terra
senza chiù friscura
e mi sentu 'na surgiva
dunni nun ci ridi chiù
l'acqua chi di la
muntagna scinnia.

Lu suli gira sempri
ma nun mi quaria,
lu ventu nun porta chiù
paroli duci
a mia.

Li stiddi to'
chiù nun mi fannu luci,
li tò vrazza
chiù nun strincinu stu corpu.
E resta sulu lu me duluri,
firita sempri aperta
chi nun sana.


Curaddi d'amuri

Curaddi d'amuri
càdinu lenti
di li me occhi
curaddi russi
assamarati di duluri.

Curaddi chi a tia,
amuri, vulussi dunari
pi' diriti chi
di lu sangu di lu me cori
si vinniru a furmari.

Lamentu d'amuri

L'ùmmira di ricordi
vesti li me jorni...
Iu ti chiamu
e tu nun mi rispunni,
né li tò vrazza chiù
mi strincinu a lu pettu.
Lu to rispiru d'amuri
mi 'mbriacava
nica mi facia
pi megghiu farimi di tia abbrazzari.
Lu to cori chi battia
era musica pi' mia
e iu filici vicinu a tua
m'addummiscia.
Mi paria
di turnari picciridda
quannu ni me matri iu curria
e idda mi dicia:
“Si' la me vita
figghia mia!”.
.



Libertà

Silenziu

'U silenziu
lu cori di la genti
sta 'nvadennu,
è un silenziu
friddu di morti
e solitudini di cori.
Ognunu camina e
curri pa' so' strata
e mancu senti
'na vuci scunsulata.
Li manu nun su boni
a carizzari,
la vucca nun è bona
a cunsulari.
Nun c'è tempu,
nun importa
li prublemi
di l'atri taliari
e ognunu pi la so
strata continua
a camminari.
E allura, sulu,
l'omu si scunsula
e a vita diventa
un pisu di purtari
un pisu dunneddu
tuttu sulu
hai li timpesti di la vita
d'affruntari.

Fineru li tempi
di l'unioni,
e di l'amuri.
Fineru li tempi
d'un Diu cunsulaturi
chi attraversu l'avutri
ti vinia a cunfurtari.

Torna, arré, a cantari

Paiseddu meu
friscu d'aria fina
e di profumi
ora ti viu
tristi e scunsulatu.
Li stratuzzi
su' vacanti di risati
tanti perì chiù
nun tessinu balati.
Sì comu chiddi
chi perdinu lu cori
pi' chistu sì tu
silinziusu e mutu.
Lu ventu sempri
s'infila nì li casi
e canta
la canzuna di l'amuri
ma un n'arruspiggia chiù
stu paiseddu duci
chi soffri
pi' malincunia.
Sulu l'aceddi
impazzuti d'amuri
cu li iurnati boni.
ravvivanu lu cori.
U casteddu
di ddà supra
sempri vigghia e talia

li casuzzi chi si strincinu
abbrazzati.
Arrispigghiati,
paiseddu meu aduratu,
apri l'ucchiuzzi
a novi pinseri.
Vonnu li casi
e li balati
la canzuni di la vita
arré cantari!

L'ummira

La me ummira iu
unn'a pozzu suppurtari
picchè di lu nenti
mi fa ricurdari.

La pistu cu li peri
ma un s'alluntana
e sempri attaccata è
a la me suttana.

Ci dicu:

“Pi’ piaciri un mì viniri appressu
vattinni, nun vogghiu
stari cu tia!”.

Ma idda è sempri
in mia cumpagnia.

Idda a la morti
mi fa pinsari
e stà saguma
senza corpu e senza cori
nissuna manu
po’ pigghiari.

L'ummira è
ummira di vita
nun si po’ sbagliari.

Ma forsi a vita nostra
è comi a idda?

È forsi sognu
d’una cosa vana?

Iu sentu chi
nun po’ esseri accussì
la nostra storia.
Nun ponnu svaniri



Amore

amuri e sentimenti,
però m'addumannu e dicu:
“Dunni sunnu l'ummira
di tutta l'atra genti?”.
51

'U sonnu

'U silenziu
si curca supra li casi
mentri lenta acchana
la luna ni lu celu.
Cummigghiatu
cu' lu sciallu di la notti
di la menti l'omu
chiudi li porti
e scorda cu lu sonnu
i so prublemi,
mentri 'u ventu
joca e rufulia
e 'a stanchizza porta via.
Li stiddi lucenti
tremanu d'amuri
e asciuganu
di l'omini i suduri.

'A vita è 'na rota

'A vita è comu
nà rota
comu 'u suli
chi nu celu acchiana
e poi vota.
A rota 'ntunnu
ti fa firriari
e tanti tappi
ti fa tuccari.
A tia luntanu
ti pari a vicchiaia
ma a un trattu
t'adduni chi arrivasti
e a vita mancu
bona la gustasti.
Però 'a rota
pi' tanti genti
prima si ferma
e scinniri hannu
e iddi nun sannu
picchì prestu
di lu munnu si ni vannu.
Idda è indifferenti:
di li scinnuti
e l'acchianati di la genti
nun ci 'mporta nenti.
Idda firria senza taliari
e li prublemi di l'omu
voli 'gnurari.

E a rota sempri,
sempri firria
e idda a nuddu 'nfacci talia,
a rota sempri,
sempri firria
e un s'interessa propriu
di tua.

Ricordu

Nà naca ju ricordu
sempri china
d'un nutricheddu
cu la vuccuzza ad aneddu.
Sutta nà scala
di lignu antica
du cordi pinnianu
e tinianu un pezzu
di stoffa quattrittata
chi comi un nidu accuggchia
lu tepidu caluri
di 'na criatura vattiata.
E appena idda chiancia
la matri prestu accurrià.
nà tirata
a stù littuzzu dava
e u chiantu subitu finia
e comu pì magia 'u nutricu s'addummiscia.
'A nonna vicchiaredda
ogni tantu lu ia a taliari
e poi continuava
supra nà siggitredda
a magghia a fari.
Vita d'amuri,
vita di rispettu.
'U principiu e la fini
in armunia stava
e tutta la casa
la canzuni di l'amuri
ammantava.